



KENYATAAN MEDIA

6 Jun 2016

Beri Komitmen Jitu Kepimpinan Naib Canselor Baharu UniMAP - Raja Muda Perlis

ARAU, 6 Jun (Bernama) -- Raja Muda Perlis Tuanku Syed Faizuddin Putra Jamalullail bertitah agar warga Universiti Malaysia Perlis (UniMAP) memberi komitmen jitu dan kepercayaan kepada Naib Canselor baharu, Datuk Prof Dr Zul Azhar Zahid Jamal untuk membawa universiti berkenaan ke mercu kegemilangan.

Baginda bertitah sebagai Universiti Awam (UA) yang berusaha mencapai sasaran 500 universiti terbaik dunia, faktor kualiti bidang pengajian, program berimpak tinggi, peningkatan pelajar antarabangsa dan inisiatif-inisiatif berkaitan hendaklah diberikan penekanan.

Tuanku Syed Faizuddin yang juga Canselor UniMAP bertitah pemotongan peruntukan kepada UA merupakan cabaran bagi pengurusan universiti untuk menjana pendapatan melalui pelbagai aktiviti, kreativiti dan inovasi baharu.

"Gunakanlah sumber kepakaran yang ada termasuk mengeksploitasi ilmu dan pengalaman 14 tahun bekas Naib Canselor pertama UniMAP, Profesor Emeritus Datuk Dr Kamarudin Hussin untuk melonjakkan UniMAP," titah baginda.

Tuanku Syed Faizuddin bertitah selepas menyaksikan majlis penyerahan nota tugas kepada Zul Azhar oleh Kamarudin di Dewan Kecemerlangan UniMAP di sini hari ini.

Raja Puan Muda Perlis merangkap Pro Canselor UniMAP Hajah Tuanku Lailatul Shahreen Akashah Khalil juga berkenan hadir pada majlis itu.

Baginda berharap usaha Kamarudin memperhebatkan kualiti penyelidikan UniMAP diperhebatkan lagi oleh Zul Azhar, selain Petunjuk Utama Prestasi (KPI) dan penerapan nilai serta etika dalam kalangan warga universiti dioptimumkan.

"Saya juga ingin mengingatkan kepentingan pengurusan masa dan kewangan yang baik dalam membangunkan piawaian, garis panduan, dan penanda aras UniMAP bagi usaha mencapai sasaran 500 universiti terbaik dunia," titah baginda.

Dikeluarkan Oleh :

Aininulniza Mohd Yusof (aininulniza@unimap.edu.my)

Pegawai Perhubungan Media UniMAP